

## **Marionna Huonder-Monn, Sedrun**



Il tuchiez da s. Vigeli annunzia ils 28 da matg 1996 la mort da nossa convischina Marionna Huonder, sesenta ella casa s. Vigeli a Gonda. La Marionna ei naschida ils 20 da settember 1904 a Camischolas. Siu bab ei staus president communal e deputau Gion Felici Monn; sia mumma ed emprema consorta da Gion Felici la Maria Nescha Cavegn da Sedrun. La mumma ei gia morta ils 24-12-1908; la Marionna veva pia ses quater onns. Quella sperdita ha segiramein caschunau profunda dolur alla pintga buoba e relaschau fastitgs cuzzeivels. Cun l' Onna Maria Cavegn da Rueras, sco secunda consorta da Gion Felici, retscheiva la Marionna ina buna mumma. Ensemens culs fargliuns,

duas soras ord l'emprema letg ed in buob ed ina buoba ord secunda letg passenta la Marionna sia affonza el vitg natal a Camischolas. Suenter las scolas dil vitg tucca ei era alla Marionna sco a biars auter lezs onns, da serender egl jester; quei denton mo per in cuort temps. Turnond a casa tucca ei ad ella da segidar culs geniturs e fargliuns el tenercasa ed el menaschi puril.

Igl onn 1929 marida ella Baseli Huonder, bostger communal, da Sedrun. Ils giuvens conjugals secasan a Sedrun sisum il vitg ella nova casa si Spinatscha. La giuvna famiglia crescha. Otg affons neschan el ravugl dalla ventireivla famiglia, duas e feglias e sis feglis. Sulegl ed umbriva sebrattan era en quella famiglia, aschia la mort dil fegl Sigisbert ella vegliadetgna da quater onns e miez, che ha caschunau als geniturs tristezia e cordoli. Igl onn 1977 piarda la Marionna siu mariu Baseli. Cun vertid cristiana supporta ella la sperdita da siu car um e bab da famiglia.

Igl onn 1989 serenda la Marionna en casa da s. Vigeli vin Gonda per passentar la beinmeritada sera dalla veta. Ils 28 da matg cloma il Segner a casa tier el la Marionna ella biala vegliadetgna da 92 onns. Ils ses da casa piardan ina buna e cara mumma che ha sia veta ora mussau buontad e carezia. Ils 30 da matg accumpogna in grond pievel la Marionna sil santeri da s. Vigeli. Il comiau d'ina buna vischina e mumma fa mal. Ella meretta pasch eterna.